




# ხაშურის მთაშუა



№30 (161)

30 ივლისი, ორშაბათი,

2018 წელი



## 5 რეგიონის სახელმწიფო რწმუნებული თანამდებობიდან გაათავისუფლეს

როგორც პრემიერმინისტრმა მამუკა ბახტაძემ მთავრობის სხდომამდე გამართულ პრესკონფერენციაზე განაცხადა, დღეიდან თანამდებობიდან თავისუფლდებიან შემდეგი რეგიონების სახელმწიფო რწმუნებულები: შიდა ქართლის, მცხეთა მთიანეთის, სამეგრელო-ზემო სვანეთის, ქვემო ქართლის და სამცხე - ჯავახეთის გუბერნატორები.

მისივე თქმით, ამ რეგიონებში, ისევე როგორც იმერეთში, უახლოეს დღეებში წარადგენს ახალ სახელმწიფო რწმუნებულებს. „იმ მიზნებიდან გამომდინარე, რაც ჩვენს მთავრობას აქვს გაცხადებული, აუცილებელია ახალი მიდგომები რეგიონის მართვასთან და ცენტრალურ ხელისუფლებასთან კოორდინაციის თვალსაზრისით“, - განმარტა პრემიერმა.

## საინტერესო დისკუსია ევროკავშირისა და ნატოს შესახებ



ხცისის ბიბლიოთეკაში ევროატლანტიკურ სტრუქტურებში ინტეგრაციის შესახებ შეხვედრა გაიმართა.

„ითუბი ევროკავშირისა და ნატოს შესახებ“, - ამ სახელწოდების პრეზენტაცია წარუდგინა აუდიტორიას მუნიციპალიტეტის მერიის საზოგადოებასთან ურთიერთობის და საინფორმაციო განყოფილების უფროსმა ნინო სუხიაშვილმა.

შეხვედრას ესწრებოდნენ ხაშურის მუნიციპალიტეტის მერის მოადგილე ზურაბ ჩხიტუნიძე, ხაშურის მუნიციპალიტეტის მერის თანაშემწე მერაბ ბარბაქაძე, ხაშურის მუნიციპალიტეტის ბიბლიოთეკის ამერიკული კუთხის კოორდინატორი ქეთევან მეტრეველი, ხცისის ადმინისტრაციული ერთეულის და საჯარო სკოლის წარმომადგენლები, ახალგაზრდები, დაინტერესებული პირები.

გაიმართა საინტერესო დისკუსია. შეხვედრის ინიციატორებმა უპასუხეს აუდიტორიის შეკითხვებს და იმსჯელეს იმ პოზიტიური შედეგების შესახებ, რაც ევროატლანტიკურ სტრუქტურებში ინტეგრაციას და ინტეგრაციის მიმართულებით განხორციელებულ ძალისხმევას ახლავს თან.

შეხვედრა ხაშურის მუნიციპალიტეტის მერიის ინიცირებით და მხარდაჭერით, ასევე ბიბლიოთეკის ამერიკის კუთხის „მობილური პროგრამა სოფლებისთვის“ ტექნიკური მხარდაჭერით მოეწყო. საინფორმაციო კამპანია, რომელიც მიზნად ისახავს მოქალაქეების ინფორმირებას ევროატლანტიკური სტრუქტურების და ინტეგრაციის პოზიტიური შედეგების შესახებ, ხაშურის მუნიციპალიტეტის სოფლებში კვლავაც გაგრძელდება.



## ლუკა მაისურაძე უნივერსიადის ჩემპიონია

ლუკა მაისურაძის წარმატებები არაერთხელ აღგვინიშნავს ჩვენს გაზეთში. ჩვენი სასპორტო სკოლის აღზრდილს (მწვრთნელი ბეგლარ ხარშილაძე) ბევრჯერ გავუხარებივართ ევროპის თუ მსოფლიოს მასშტაბის ტურნირზე მოპოვებული წარმატებებით. ამჯერად პორტუგალიიდან მოვიდა სასიხარულო ცნობა: ლუკა ამ ქვეყანაში მიმდინარე ევროპის უნივერსიადის ჩემპიონი გახდა და ოქროს მედლით დაიმშვენა მკერდი.

გულოცავთ ლუკას, მის მწვრთნელს, გულშემამტკივრებს და ყველას ამ გამარჯვებას და გვჯერა, წინ უფრო მნიშვნელოვანი წარმატებები იქნება.

### - სოფლის მეურნეობა -

## ბიოფერმერი, რომელიც უნიკალურ ქართულ ჯიშებს ამრავლებს

მსოფლიოში და მათ შორის საქართველოშიც, ყოველწლიურად იზრდება მოთხოვნილება ბიოლოგიურად სუფთა პროდუქტზე. ეკო, ბიო, ორგანული-ეს სინონიმებია და აღნიშნავს ეკოლოგიურად სუფთა პროდუქტს. ბიოპროდუქტი გულისხმობს მთელ პროცესს, დაწყებულს ფერმერის მიერ მოყვანით და გადაამუშავებით დამთავრებული, როცა პროდუქტის წარმოებისას არ გამოიყენება შხამ-ქიმიკატები, ჯანმრთელობისათვის მავნე კონსერვანტები. ეკოლოგიურად სუფთა პროდუქტები 20-100 %-ით ძვირია ჩვეულებრივ პროდუქტებზე. სამწუხაროდ, საქართველოს ბაზარი სხვადასხვა სოციალურ-ეკონომიკური მიზეზების გამო, მზად არ არის ამგვარი პროდუქტების ასათვისებლად, თუმცა მცდელობა ნამდვილად შეინიშნება. მინდა გაგაცნოთ სოფელ ნაბახტევში მცხოვრები ბიოფერმერი, 11 გრანტის მფლობელი, ანზორ მაისურაძე, რომელიც პროფესიით ბიოლოგია და 2006 წლიდან ბიოპროდუქტის, კერძოდ ბიოხორბლის წარმოებითაა დაკავებული. გარდა იმისა, რომ ბიოხორბალს აწარმოებს, მისი ხორბლის კოლექცია 135 სახეობის ქართული ჯიშის ხორბალს ითვლის და უნიკალურ კოლექციად ითვლება. როგორია მოთხოვნა ბაზარზე, რამდენად აკმაყოფილებს ქვეყანაში წარმოებული პროდუქცია ბაზარს, ამ და სხვა კითხვებზე თავად ბატონი ანზორისგან მივიღებთ პასუხს:

-სოფელ ნაბახტევში ვცხოვრობ, ჩემი პროფესიიდან გამომდინარე, გადავწყვიტე ბიომეურნეობით დაკავებულყავი. დღეს მაქვს 25 ჰა ბიოფართობი, რომელიც არ მუშავდება ქიმიურად, არ მუშავდება ინტენსიურად და მხოლოდ ბიოლოგიურ პრეპარატებსა და მეთოდებს ვიყენებ.

- როგორც ვიცი, ხორბლის წარმოებით ხართ დაკავებული და ქართული ჯიშების კოლექციაც გაქვთ...

-დიახ, ესაა მარცვლოვანი კულტურები, ხორბალი და პარკოსნები. მარცვლოვანებიდან ვაწარმოებ ხორბალს, რადგან მაქვს ხორბლის 135 უძველესი

(გაგრძელება IV გვერდზე)

# ყვედაფერი დაგროვებითი საპენსიო სისტემის შესახებ - რამდენი დარის გადახდა მოგინევთ ხელფასიდან ყოველთვიურად და ვისთვის იქნება სავადლებულო ჩართვა ამ სისტემაში?

პარლამენტმა “დაგროვებითი პენსიის შესახებ” კანონპროექტი თანმდევ საკანონმდებლო ცვლილებებთან ერთად, მესამე მოსმენით მიიღო. მას საბოლოოდ ძალაში შესვლისთვის პრეზიდენტმა უნდა მოაწეროს ხელი. როგორც ეკონომიკის სამინისტროში აცხადებენ, აღნიშნულ კანონთა პაკეტი საპენსიო რეფორმის შემადგენელი ნაწილია, რომლის მთავარ მიზანსაც საქართველოში არსებული სოციალური სისტემის სრულყოფა წარმოადგენს.

გთავაზობთ დაგროვებითი საპენსიო სისტემის შესახებ დასმულ ყველაზე აქტუალურ კითხვებზე პასუხს.

## ვინ მიიღებს მონაწილეობას დაგროვებით საპენსიო სქემაში ?

ამ კანონის მოქმედება ვრცელდება: დამსაქმებლებზე, საქართველოს მოქალაქეებზე, გარდა არარეზიდენტი ფიზიკური პირებისა; საქართველოში მუდმივად მცხოვრებ უცხო ქვეყნის მოქალაქეებზე ან/და მოქალაქეობის არმქონე პირებზე, გარდა არარეზიდენტი ფიზიკური პირებისა; ვისთვის არის სავადლებულო დაგროვებით საპენსიო სქემაში ჩართვა და ვის შეუძლია მონაწილეობაზე უარის თქმა?

დაგროვებით საპენსიო სქემაში გაწევრება სავადლებულო ყველა დასაქმებულისთვის, გარდა დასაქმებულისათვის, რომელსაც ამ კანონის ძალაში შესვლამდე შეუსრულდა 60 წელი (ქალების შემთხვევაში 55 წელი), შესაბამისად ნებაყოფლობითა ყველა დასაქმებულისათვის, რომელსაც კანონის ძალაში შესვლამდე შეუსრულდა 60 წელი (ქალების შემთხვევაში 55 წელი).

თითოეული დასაქმებული ხდება დაგროვებითი საპენსიო სქემის მონაწილე ამ კანონის ამოქმედების შემდეგ პირველი ხელფასის მიღებისთანავე.

თითოეული თვითდასაქმებული ხდება დაგროვებითი საპენსიო სქემის



მონაწილე კანონის ამოქმედებიდან მის მიერ პირველი საპენსიო შენატანის განხორციელებისთანავე. თითოეული თვითდასაქმებული დაგროვებით საპენსიო სქემაში წევრიანდება ნებაყოფლობით.

დასაქმებული, რომელსაც ამ კანონის ძალაში შესვლამდე შეუსრულდა 40 წელი და არ სურს იყოს დაგროვებითი საპენსიო სქემის მონაწილე, უფლება აქვს გავიდეს დაგროვებითი საპენსიო სქემიდან. ამისთვის მან წერილობით უნდა მიმართოს საპენსიო სააგენტოს და გავიდეს დაგროვებითი საპენსიო სქემიდან გაწევრიანებიდან ხუთი თვის განმავლობაში, მაგრამ არანაკლებ სამი თვისა. წინააღმდეგ შემთხვევაში, დასაქმებული რჩება დაგროვებითი საპენსიო სქემის მონაწილედ.

დაგროვებითი საპენსიო სქემის იმ მონაწილეებს, რომელთაც უარს იტყვიან სისტემაში ჩართვაზე, მოგვიანებით კვლავ ექნებათ თუ არა სისტემაში მონაწილეობის მიღების უფლება?

დასაქმებულს, რომელიც უარს განაცხადებს დაგროვებით საპენსიო სქემაში მონაწილეობაზე, შეუძლია ნებისმიერ დროს თავიდან გაწევრიანდეს მასში. მონაწილის ხელახალი გაწევრებისას დამსაქმებლის, დასაქმებულისა და სახელმწიფოს საპენსიო შენატანების განხორციელება დაიწყება გაწევრებიდან ხელფასის პირველი გადახდისთანავე.

დასაქმებული მონაწილე, რომელსაც დროებით შეუჩერდება ხელფასის სახით თანხის მიღება, დროებით შეაჩერებს საპენსიო სქემაში შენატანების განხორციელებას და განაახლებს შეტანას ხელფასის სახით თანხის მიღების აღდგენისთანავე. თუ მონაწილე შეწყვეტს შენატანის განხორციელებას შრომითი ურთიერთობის შეწყვეტის, ან ისეთი მიზეზით, როგორცაა შევსებული ორსულობის, მშობიარობისა, ბავშვის მოვლისა და ახალშობილის შეილად აყვანის, ან დროებითი ან ხანგრძლივი შრომისუუნარობის გამო, საპენსიო აქტივები რჩება მის ინდივიდუალურ ანგარიშზე.

თვითდასაქმებულ მონაწილეს, რომელიც შეაჩერებს საპენსიო შენატანების განხორციელებას, შეუძლია ნებისმიერ დროს განაახლოს ის.

მონაწილეს, რომელიც გადაწყვეტს საქართველოს მუდმივად დატოვებას, შეუძლია მოითხოვოს საკუთარ საპენსიო ანგარიშზე დაგროვილი თანხის მიღება ერთიანი გადახდის მოთხოვნით ან პროგრამული გატანით. მოთხოვნა დაკმაყოფილდება, თუ მონაწილე წარმოადგენს სხვა

ქვეყანაში კანონიერი მუდმივი ცხოვრების უფლების დამადასტურებელ სათანადოდ დამოწმებულ დოკუმენტს. ასეთ შემთხვევაში დაგროვებითი საპენსიო სქემის მონაწილის საპენსიო ანგარიშიდან მისაღებ თანხას ჩამოეჭრება სახელმწიფოს მიერ მის სასარგებლოდ განხორციელებული შენატანის ღირებულება, ხოლო დარჩენილი მისაღები თანხის მოცულობა დაიბეგრება.

ვინ და როგორ ჩაურიცხავს დაგროვებითი საპენსიო სქემის მონაწილეს თანხას?

დაგროვებითი საპენსიო სქემის მონაწილე დასაქმებული და თვითდასაქმებული პირებისთვის საპენსიო შენატანების დაფინანსება განხორციელდება დასაქმებულის, დამსაქმებლის და სახელმწიფოს მიერ.

დაგროვებითი საპენსიო სქემის მონაწილე დასაქმებულის შენატანების დაფინანსება განხორციელდება შემდეგი სახით:

ხელფასის გაცემისას, თითოეული დამსაქმებელი დაგროვებითი საპენსიო სქემის მონაწილე, თითოეული დასაქმებულის ინდივიდუალურ საპენსიო ანგარიშზე ელექტრონული სისტემის მეშვეობით განახორციელებს შენატანს მასზე გასაცემი დასაბეგრი ხელფასის 2%-ის ოდენობით.

დამსაქმებელი ასევე დასაქმებულის სახელით, მის საპენსიო ანგარიშზე ელექტრონული სისტემის მეშვეობით გასაცემი დასაბეგრი ხელფასის 2%-ს გადარიცხავს.

დაგროვებითი საპენსიო სქემის მონაწილე - თვითდასაქმებული განახორციელებს შენატანს თავისი წლიური შემოსავლის 4%-ის ოდენობით.

სახელმწიფო მონაწილის ინდივიდუალურ საპენსიო ანგარიშზე გადარიცხავს 2%-ს დასაბეგრი ხელფასის ან/და თვითდასაქმებულის შემოსავლის იმ მოცულობაზე, რომელიც ჯამურად არ აღემატება მონაწილის მიერ წლიური ხელფასის ან/და თვითდასაქმებულის შემოსავლის სახით მიღებულ 24 000 ლარს, ხოლო 1%-ს მონაწილის მიერ ხელფასის ან/და თვითდასაქმებულის შემოსავლის სახით მიღებულ თანხაზე 24 000 ლარიდან 60 000 ლარამდე.

სახელმწიფო არ განახორციელებს საპენსიო შენატანს მონაწილის მიერ წლიურად დასაბეგრი ხელფასის ან/და თვითდასაქმებულის შემოსავლის სახით მიღებულ იმ მოცულობაზე, რომელიც აღემატება 60 000 ლარს.

საპენსიო სააგენტო არანაკლებ კვარტალში ერთხელ მიაწვდის თითოეულ მონაწილეს ინფორმაციას საკუთარ ინდივიდუალურ საპენსიო ანგარიშზე მიღიანი აქტივების ღირებულების შესახებ, შენატანების თარიღების და საინვესტიციო ამონაგების მითითებით.

როგორ შეგვიძლია განვკარგოთ და როდის შევძლებთ მივიღოთ საპენსიო ანგარიშზე არსებულ თანხას.

საპენსიო აქტივები, რომლებიც დაგროვებითი საპენსიო სქემის თითოეული მონაწილის ინდივიდუალურ საპენსიო ანგარიშზე იქნება, წარმოადგენს მონაწილის საკუთრებას. აღნიშნულ საკუთრებაზე განკარგვის უფლება წარმოიშობა მხოლოდ საპენსიო ასაკის მიღწევისას.

მონაწილის ქონებრივი უფლებები მის საპენსიო აქტივებზე არ შეიძლება დაგირავდეს, უფლებრივად დაიტვირთოს, მასზე საკუთრების უფლება გადაეცეს მესამე პირს ან სხვაგვარად გასხვისდეს მონაწილის მიმართ არსებული რაიმე მოთხოვნის დასაკმაყოფილებლად ან უზრუნველსაყოფად.

მონაწილე, საპენსიო ასაკის მიღწევის შემდეგ უფლებამოსილია, მიიღოს საკუთარ ინდივიდუალურ საპენსიო ანგარიშზე არსებული საპენსიო აქტივის ღირებულების შესაბამისი მოცულობის თანხა მთლიანი თანხის, ერთიანი გადახდის ან პროგრამული ყოველთვიური გატანის (პროგრამულად გასაცემი თანხის ოდენობა გამოითვლება ინდივიდუალურ საპენსიო ანგარიშზე მონაწილის პენსიაზე გასვლის თარიღისათვის რიცხული საპენსიო აქტივების ღირებულების მონაწილის სიცოცხლის მოსალოდნელ დარჩენილ ხანგრძლივობაზე გაყოფით) ფორმით.

საპენსიო ასაკის მიღწევის შემდეგ, დაგროვილი თანხის ერთიანად გატანა შესაძლებელი იქნება მხოლოდ შემდეგ შემთხვევებში:

1. თუ გახდით შეზღუდული შესაძლებლობების მქონე პირი;
2. თუ ქვეყანა დატოვეთ და საცხოვრებლად გადახვედით სხვა ქვეყანაში;
3. მცირე პერიოდის განმავლობაში დაგროვებულია მცირე რაოდენობის თანხა.

მონაწილე, რომელიც გადაწყვეტს პენსიაზე გასვლას საპენსიო ასაკის მიღწევისას, ვალდებულია წერილობით შეატყობინოს საპენსიო სააგენტოს საპენსიო ასაკის მიღწევისას პენსიაზე გასვლის შესახებ გადაწყვეტილების მიღების თაობაზე და საპენსიო ასაკის მიღწევამდე არანაკლებ 30 დღით ადრე მოითხოვოს საპენსიო ასაკიდან პენსიის გადახდის დაწყება.

მონაწილე უფლებამოსილია, გადადოს პენსიაზე გასვლის თარიღი საპენსიო ასაკს მიღმა და დაიწიოს პენსიის მიღება ნებისმიერ დროს საპენსიო ასაკის მიღწევის შემდეგ. ასეთ შემთხვევაში, მონაწილემ წერილობით უნდა შეატყობინოს საპენსიო სააგენტოს პენსიაზე გასვლის თარიღი არანაკლებ ასეთ თარიღამდე 30 დღით ადრე.

საპენსიო სააგენტო დაიწყებს პენსიის გადახდას მონაწილის ინდივიდუალური საპენსიო ანგარიშიდან არაუგვიანეს 30 დღეში პენსიაზე გასვლის თარიღის შესახებ შეტყობინების მიღებიდან.

მონაწილეს უფლება აქვს, მიიღოს პენსია შესაძლებლობის შეზღუდვის გამო საპენსიო ასაკის მიღწევამდე, თუ მას მიენიჭება ასეთი სტატუსი საქართველოს კანონმდებლობის შესაბამისად.

რა მოხდება საპენსიო ასაკამდე ადამიანის გარდაცვალების შემთხვევაში

თუ მონაწილე გარდაიცვალა, მის ინდივიდუალურ საპენსიო ანგარიშზე არსებული თანხები გადაეცემა მის მემკვიდრეს. გადახდა შეიძლება განხორციელდეს ერთიანი გადახდით ან საპენსიო აქტივების გადატანით მემკვიდრის ინდივიდუალურ საპენსიო ანგარიშზე, მემკვიდრის არჩევანის შესაბამისად. მემკვიდრის მიერ ერთიანი გადახდით არჩევანის შემთხვევაში გასაცემი თანხა დაიბეგრება.

# ორი სამშობლოს შვილის სიზმარ-ცხადი

გასულ წელს, ისრაელის ამჟამინდელ დედაქალაქ თელ-ავივში, გამოიცა სურამში დაბადებული და გაზრდილი მწერლის, იზოლდა ჯანაშვილი-კრიხელის წიგნი „სურამული სიზმარ-ცხადი“, რომელშიც, ძირითადად, აღწერილია სურამელ ებრაელთა ცხოვრება მე-20 საუკუნეში.

ვიდრე ამ წიგნის მოკლე მიმოხილვას წარმოვიდგენთ, მინდა მცირე ინფორმაცია მოგაწოდოთ ამ წიგნის ავტორის შესახებ.

იზოლდა ჯანაშვილი დაიბადა 1942 წელს, დაბა სურამში. მან, 1959 წელს, ოქროს მედალზე დაამთავრა სურამის პირველი საშუალო სკოლა, ვიყავით თანაკლასელები. დღემდე გულწრფელი სიყვარულით და პატივისცემით ვისვენებ ამ უნიჭიერესი, სულიერ-ხორციელად ულამაზესი გოგონას კეთილშობილურ ყოფა-ქცევებს, მის გამორჩეულად ჭკვიანურ საუბრებს, თანაკლასელებისადმი გულთბილ დამოკიდებულებას, სწავლაში ჩამორჩენილებისადმი ზრუნვას



და დახმარებას. იზო, საკუთარი თავისუფალი დროის ხარჯზე, ამცადინებდა სუსტი აკადემიური მოსწრების თანაკლასელებს. იყო სანიშნო ყოფა-ქცევის საჩვენებელი გოგონა, მუდამ მომღიმარი სახით. აქტიურად მონაწილეობდა საკლასო თუ სასკოლო ღონისძიებებში. ამ გონებაგაცისკროვნებულ გოგონას ბავშვობიდანვე ემჩნეოდა განსაკუთრებული მიდგომების ნიჭი არა მარტო საკლასო ლიტერატურისადმი, არამედ ცხოვრებაში მიმდინარე პროცესების ირგვლივ მსჯელობებში.

სხვადასხვა წრეებში მისი გამოსვლები ყოველთვის იმსახურებდა ყურადღებას და მოწონებას. იგი წარმოგვიდგებოდა არა როგორც სკოლის მოწაფე, არამედ როგორც ცხოვრებით დაბრძენებული მოქალაქე, რომელსაც უნარი შესწევს განჭვრიტოს მომავალი.

მიკვირს, როგორ ვერ შევნიშნეთ მასში ჩაბუდებული ის რაღაც იდუმალი, რაც მის პიროვნებაში იმალებოდა. ეს იყო განცდა ორი სამშობლოს შვილობისა და ორივეს სიყვარული, საქართველოსი, რომელიც აშკარად უყვარდა, ეყვრებოდა და უმღეროდა და ისრაელისა, რომელიც მის წარმოდგენაში იჯდა იდუმალი მყუდროებითა და სულიერი სისპეტაკით.

ალბათ ასეთმა, დღემდე შეუცნობელმა მდგომარეობამ უკარნახა მწერალს წიგნის დასათაურება და ეს გასაგებიცაა. სურამში ცხადში იყო და ისრაელი ესიზმრებოდა, ახლა ისრაელშია ცხადში და სურამი ესიზმრება. ორივე სამშობლო ხომ სულიერად ზრდიდა და აყალიბებდა მის მოქალაქეობრივ მრწამსს, დაყრდნობილს ზოგადსაკაცობრიო იდეალებსა და ზნეობრიობაზე.

ჩვენო საყვარელო მეგობარო იზოლდა, შენ ორივე მიწის საამაყო შვილი ხარ. ვერც სიზმარში და ვერც ცხადში ვერაინ დაგვაყვებდრებს მათზე სიარულს. შეგიძლია იამაყო ორივე სამშობლოს ურთიერთსიყვარულით და იმ ადამიანთა დამოკიდებულებებით, რომელთა გულებშიც ზისარ, როგორც სიყვარულის, მეგობრობის და რწმენისადმი ერთგულების სიმბოლური შექურა.

იზოლდა ჯანაშვილი-კრიხელმა ხსენებული წიგნის გამოცემით უკვდავების ძეგლი აუგო სურამში მე-20 საუკუნეში მცხოვრებ ებრაელებს, რომლებმაც, ქართველ ხალხთან ერთად, გადაიტანეს ამ ჯოჯოხეთური საუკუნის შავნებელი ქარტყილები, რევოლუციები, ომები, რეპრესიები, კონფლიქტები, პოლიტიკური რყევები, დამცირება, ღმერთის უარყოფის ქადაგება, მორწმუნეთა დევნა, უსამართლო კანონების შემოქმედება და ა.შ.

მწერალი მიუკერძოებლად აღწერს იმ სიმახინჯეს და სინამდვილეს, რაც ფესვადგმული იყო იმდროინდელ ცხოვრებაში. მის სასახელოდ, ერთხელაც არ წამოცდენია საყვედური ქართველი ხალხის მიმართ, რომელთა გვერდითაც

ებრაელობამ გაატარა ორათეულ საუკუნეზე მეტი, თუმცა, მტკივნეულად აღნიშნავს ცალკეულ შემთხვევებს, როცა სახელმწიფოს არაკეთილსინდისიერ მოხელეთა მხრიდან, ადგილი ჰქონდა ებრაელებისადმი დამოკიდებულებაში ზნეობის, მორალის თუ კანონის მოთხოვნების დარღვევებს და გადაჭარბებას.

ცალკეულ მოხელეთა, ძირითადად კი მილიციის მხრიდან, თავაშეებულობის გამოვლენებებს მწერალი უკავშირებს საქართველოში ბოლშევიკების შემოსვლას, რომელთა იდეოლოგიამ ბრძოლა გამოუცხადა სარწმუნოებას და ყოველგვარ ეროვნულ ტრადიციებს. მოგეხსენებათ, ურწმუნო და გაუნათლებელი კაცი რამდენად საშიშია.

იმდროინდელი კანონმდებლობით იკრძალებოდა ვაჭრობა, რაიმეს ყიდვა და გაყიდვა-გამორჩენის მიზნით და ისჯებოდა სისხლის სამართლის კანონმდებლობით ჯარიმიდან 7 წლამდე თავისუფლების აკეცივით, ქონების კონფისკაციით.

წარმოდგინეთ, ახლა რომ ისეთი კანონი მოქმედებდეს, მოსახლეობის რამდენი პროცენტი აღმოჩნდებოდა გისოსებს მიღმა.

სურამში მცხოვრებ ებრაელთა გარკვეული ნაწილი სწორედ ასეთი აღებ-მიცემობით ირჩენდა თავს.

სურამში ჩიტიც რძესაც კი იშოვიო, ამბობდნენ მაშინ. ფარულ სავაჭრო ქსელში შეგვეძლო შეგვეძინა ყველაფერი, ნემსიდან დაწვებული უახლესი ნიმუშების ტანსაცმელ-ფეხსაცმლის, საოჯახო და სხვა ნივთების ჩათვლით.

ეს საქმე დიდ რისკთან იყო დაკავშირებული. როგორც მწერალი ამბობს, ხშირად ხდებოდა „აბლაგები“, „ობისკები“, „ჩაშვებები“, „ჩახაფრებები“, „შანტაჟი“, სავაჭრო საქონლის წართმევა-ჩამორთმევეები და ა.შ. რის შედეგადაც სახელმწიფოს უპატიოსნო მოხელენი გვარიანად ითბობდნენ ხელს.

„გამოჭერილებს“ ციხეში წასვლის ნაცვლად ერჩიათ ქრთამის მიცემა, თუმცა, ხშირად ესეც ვეღარ შეელოდა საქმეს და მოვაჭრეთა ოჯახები რჩებოდნენ ულუკმაპუროდ, ყოველგვარი შემოსავლის გარეშე.

მწერლის მიზანი არ არის მხოლოდ უარყოფითის წარმოჩენა და ასეთ უმსგავსეობაზე ყურადღების გამახვილება, მაგრამ ამის ართქმაც არ შეიძლებოდა. ყველას უნდა ეყოს ვაჭაკობა და სინამდვილეს შეხედოს თვალეში. რეალობას ვერსად გაექცევი. ცხოვრება არც ისე მშვენიერია, რომანტიკოსებს რომ წარმოუდგენიათ, იგი ჯოჯოხეთის ნაწილიცაა.

მწერლის მიზანია, აჩვენოს მსოფლიოს ებრაელი ხალხის სულის გაუტეხელობა, გამძლეობა, რომელმაც თავისი ისტორიული მიწა-წყლის სიყვარული და სარწმუნოების ერთგულება თაობიდან თაობას გადასცა და უცვლელად შემოუნახა მას მამა-პაპისეული ტრადიციები.

ამავე დროს, მწერალი ცდილობს საზოგადოებას გააცნოს და შთამომავლობას შემოუნახოს იმ ღირსეულ ებრაელთა ხსონა, რომლებიც დაიბადნენ სურამში და თავისი ღირსეული სასულიერო თუ საერო მოღვაწეობით სახელი გაუთქვეს საქართველოს ამ ულამაზეს კუთხეს.

დიახ, სურამს შეუძლია იამაყოს, რომ მე-20 საუკუნეში მის წიაღში აღმოცენდნენ, ფეხ აიდგეს, დავაჟაკდნენ და ფასდაუდებელი მიღწევებით თავისი სიტყვა თქვეს მეცნიერებაში, ხელოვნებაში, სპორტში, რელიგიასა თუ სხვა მიმდინარეობებში.

შევეცდები, მკითხველს ძალიან მოკლედ მივაწოდო ინფორმაცია ამ ღირსეულ ადამიანთა ნაწილის შესახებ:

- მიხეილ ჯანაშვილი-როკეტლიშვილი. დაიბადა 1928 წელს. დაამთავრა თბილისის სახელმწიფო უნივერსიტეტის იურიდიული და ეკონომიკური ფაკულტეტები. დაიცვა მეცნიერებათა კანდიდატისა და დოქტორის სამეცნიერო ხარისხები. მიენიჭა დამსახურებული ეკონომისტის და პროფესორის წოდებები. არის რამდენიმე ქვეყნის და დარგობრივი აკადემიების წევრი, ასევე ნიუ-იორკის მეცნიერებათა აკადემიის ნამდვილი წევრი, 70-ზე მეტი სამეცნიერო-კვლევითი ნაშრომის და 9 მონოგრაფიის ავტორი. დაჯილდოებულია საქართველოს ღირსების ორდენით. ამჟამად, ცხოვრობს ნიუ-იორკში.

- დიანა იაკობის ასული დავარაშვილი (1910-1992 წწ) პოეტი. ექიმი. მინიჭებული აქვს აჭარის დამსახურებული ექიმის საპატიო წოდება. მისი შვილის, ბესიკის მიერ გამოქვეყნებული მინიატურული ჭადრაკი, რომელიც ხელის გულზე ეტყვა, შესულია გინესის წიგნში, როგორც უნიკალური ნამუშევარი.

- სიმეა ჯანაშვილი. პოეტი. საზოგადო მოღვაწე. სურამის მეხოტბე.

- აბრამ მიხაელის ძე ჯანაშვილი (1947-1999), ისრაელში ახლადდასახლებულთა შორის პირველს მიენიჭა ისრაელის დამსახურებული ინჟინრის წოდება..

- იაკობ შალომის ძე ფიჩხაძე, ცნობილი მხატვარი, პედაგოგი.

- გურამ იოსების ძე ხარაზიშვილი, მედიცინის მეცნიერებათა კანდიდატი.

- სიმონ ნანიკაშვილი – ბიზნესმენი, ქველმოქმედი.

- სარა დავარაშვილი – ავტორი წიგნისა „საქართველოს ებრაელთა სამზარეულოს საიდუმლოებანი“.

- ეუზრა გაბრიელის ძე დავარაშვილი – (1941-2016 წწ), ეკონომიკის მეცნიერებათა დოქტორი, მისი დისერტაცია წიგნად გამოიცა ინგლისში.

- იცხაკ შალომის ძე წიწუაშვილი – ისრაელის სამხედრო მრეწველობის თვალსაჩინო წარმომადგენელი. მრავალი მნიშვნელოვანი საიდუმლო ოპერაციის დამგეგმავი. ისრაელის უშიშროების სამსახურის გენერალ-მაიორი. სრულყოფილად ფლობს ხუთ ენას.

- სოსოს ჭინჩიხაშვილი, ცნობილი მხატვარი, გრაფიკოსი.

- სიმონ არიელის ძე ჯანაშვილი – ცნობილი ქორეოგრაფი. ქართული ცეკვები უჩვენა მსოფლიოს მრავალ ქვეყანას. დაჯილდოებულია საქართველოს ღირსების ორდენით.

წიგნში თავისი საინტერესო ბიოგრაფიებით მოხსენიებული არიან „სურამელოდ“ წოდებული აბრამ ჯანაშვილი, მახალ-ტობ ჯანაშვილები და მარო ჯანაშვილი-ისრაელაშვილი, ასევე შალომ გაბრიელის ძე, რახამინ გაბრიელის ძე და იოსებ დავარაშვილები, იაშა მეირის ძე და დავით კოჟიაშვილები, ეფრაიმ მიხეილის ძე მანაშეროვი და სურამის მადლიან მიწაზე ფეხადგმული სხვა დამსახურებული ადამიანები.

ავტორი დიდი პატივისცემით და გულისტკივილთ იხსენებს მეორე მსოფლიო ომის დროს მონაწილე სურამელ ებრაელებს.

ავტორის სასახელოდ უნდა ითქვას, რომ ამ წიგნის გამოცემით მან



# მირიან ბარბაქაძე - ჰაყანა ქართული მოსკოვში, რომლის სახელს მომავალშიც არაერთხელ გავიგებთ

მრავალი ნიჭიერი ახალგაზრდისთვის დაგვიტოვა ჩვენი გაზეთის ფურცლები, რომელთა მათგანია, ჩვენ მუნიციპალიტეტთან ერთად, საქართველოც იამაყებდა. ბევრმა მათგანმა კი ქვეყნის სახელი საზღვარგარეთაც გაიტანა. ამ გზას დიდი სიამოვნებით ვაგრძელებთ. ამჯერად, „ხაშურის მოამბისთვის“, ყველასათვის კარგად ცნობილი მეცნიერის, ვლადიმერ ბარბაქაძის ოჯახის კარი გაიღო. გაგიკვირდებათ და, ჩვენი ვიზიტის უმთავრესი მიზანი არა ბატონი ლადო და მისი დიდებული მიღწევები იყო, არამედ, მისი 13 წლის ვაჟიშვილი მირიანი. პატარა რესპოდენტმა კი, ჩვენი ყურადღება, მისი არაჩვეულებრივი მუსიკალური მონაცემების გამო მიიპყრო. რთულია, მის ასაკში სამომავლო პროფესიასა და კარიერაზე ისაუბრო, თუმცა, საუბრიდან ნათლად გამოჩნდა, რომ მისი მუსიკასთან მეგობრობამ, რა ხანია, ღრმად გაიდგა ფეხები და ცხოვრების კრედიტ იქცა. ის შესანიშნავად მღერის და უკრავს ფორტეპიანოზე.



ვიმედოვნებთ, რომ, მისი სახით, საქართველოს ნამდვილი ვირტუოზი ეზრდება. მირიანი, ოჯახთან ერთად, მოსკოვში იზრდება, შესაბამისად, მშობლიურ ენას სათანადოდ ვერ ფლობს, რაც მამის გულისტკივილის უმთავრეს მიზეზს წარმოადგენს. თუმცა, აღნიშნავთ, რომ სწავლების პროცესი აქტიურ ფაზაშია. გამომდინარე იქიდან, რომ ზაფხულის არდადეგების ნახევარს ხაშურში ატარებს, ენის შესწავლის პროცესი საკმაოდ გააღვივებულია. დამეთანხმებით და ეს აქსიომადაც კი იქცა, რომ არცერთი სხვა ერის წარმომადგენელი ისე მძაფრად არ გამოხატავს საკუთი ქვეყნის მონატრებას, როგორც ქართველი კაცი. არ აქვს მნიშვნელობა, წარმატებული იქნები თუ დაფასებული, როგორც ეს ბატონი ლადოს შემთხვევაშია, ნოსტალგია შენი ქვეყნისა მთელი ცხოვრება თან გსდევს და ბედკრული საქართველოს შვილობა ყველაზე მეტად გემაყებდა. ჩვენ, ადვილად შევნიშნეთ, თუ როგორი ქართული სულისკვთებით იზრდება მირიანიც. ერთ მომენტში ბატონი ლადო საუბარში ჩაერთო და აღნიშნა: „მირიანი აუცილებლად დაბრუნდება საქართველოში, შექმნის ნამდვილ, ქართულ

ოჯახს, ეყოლება ქართველი მეუღლე და მისი შვილები აღიზრდებიან ქართულ მიწა-წყალზე, ტრადიციების სრული დაცვით.“ ეს თითქოსდა ბრძანებითი კილო, სინამდვილეში, უდიდესი მამაშვილური მზრუნველობის გამოხატვა იყო. უნდა აღვნიშნოთ ისიც, რომ ქართველების ერთ-ერთი მნიშვნელოვანი ნიშან-თვისება სტუმართმოყვარეობა - ეზოში შესვლითანავე ვიგრძენით. მირიანმა საოცრად გულთბილი დახვედრით გაგვიღო როგორც ეზოს, ასევე, გულის კარებიც. ჩვენი შეხვედრის ორგანიზება ბარბაქაძეების ოჯახის და ასევე რედაქციის მეგობარმა, არაჩვეულებრივმა პედაგოგმა და განუმეორებელმა ნანი განჩილაძემ ითავა. ამასთან ერთად, იგი მირიანის ფორტეპიანოს მასწავლებელია და საოცრად ამაყობს ნიჭიერი მოსწავლეთ. უკვე სამი წელია ეს ურთიერთობა გრძელდება. აქტიური და შედეგიანი მეცადინეობით კი მირიანი მრავალ კონკურსში იღებს მონაწილეობას და საკმაოდ წარმატებითაც. მოსწავლე-მასწავლებელს საუკეთესო ურთიერთობა აქვთ. საქებარი სიტყვები კი არც პედაგოგმა დაიშურა: „საოცარი მონაცემების გახლავთ მირიანი. მისი და ფორტეპიანოს იღუმელ კავშირზე ბევრი რამ შეიძლება ითქვას. ერთხელ მირიანმა მითხრა კიდევ, რომ როდესაც ფორტეპიანოზე ვუკრავ, თითქოს ცაში ვფრენ, თითქოს ფრენა უფროთ-დაც შემიძლია... მერწმუნეთ, მისი ყოველი წინ გადადგმული ნაბიჯი, ჩემი წარმატება იქნება.“

პირადად ვესაუბრეთ მირიანსაც. გონებასახვილობა და სისხარტეც ადვილად შესამჩნევია იყო. მუსიკით ასე მძაფრად დაინტერესებაზე და სამომავლო გეგმებზე ინტერვიუდან შეიტყობთ. - მირიან, პირველად როდის დაინტერესდი მუსიკით? - მუსიკით პირველად ექვსი წლის ასაკში დაინტერესდი. სკოლაში, მუსიკის პედაგოგთან მეცადინეობისას, თავად პედაგოგმა შეამჩნია ჩემი ვოკალური მონაცემები და მას შემდეგ აქტიურად ვმეცადინებო. შემდგომში, სწავლა მოსკოვში, მუსიკალურ სასწავლებელში გავაგრძელე და, ამჟამადაც, იქ ვწვლობ. სხვათაშორის, დაახლოებით, 4 წლის წინ, ოპერის მომღერალმა გიორგი გაგნიძემ მომისმინა და აღნიშნა, რომ კარგი მონაცემები მქონდა და მუშაობის შედეგად, ბევრს მივალწვედი. მისმა პასუხმა ძალიან გამახარა და მუსიკა კიდევ უფრო მეტად შევიყვარე. - მუსიკალურ კონკურსებზე თუ იღებ მონაწილეობას? - მრავალ კონკურსში მივიღე მონაწილეობა, დიპლომებიც და სიგელებიც დავიმსახურე ბოლოს მონაწილეობა მივიღე საერთაშორისო კონკურს-ფესტივალში სახელწოდებით „მსოფლიოს ტალანტები“, სადაც კონკურსის ლაურიატი ვიყავი და დოპლომით დამაჯილდოვეს. სამომავლოდ ვგეგმავ კონკურსში მონაწილეობას, რომლისთვისაც ვიკრავ ტრადიციულ ქართულ ნოხას და შევასრულებ ქართულ სიმღერას. - როგორ ფიქრობ, ვოკალური კუთხით გაყვები მუსიკას თუ ფორტეპიანოს აირჩევ? - ფორტეპიანოზე დაკრა ძალიან მიყვარს, მაგრამ სამომავლოთ ვოკალური კუთხით ვფიქრობ ჩემი ძალების გაღრმავებას, რა თქმა უნდა, ფორტეპიანოზეც გავაგრძელებ აქტიურად მეცადინეობას.

- გარდა მუსიკისა, რომელი საგნით ხარ გატაცებული? - მათემატიკა ძალიან მომიწონს. მუსიკის შემდეგ, სწორედ ამ სფეროში ვგრძნობ თავს თავისუფლად. წარმატებას ვუსურვებთ პატარა მუსიკოსს, დიდი იმედი გვაქვს, რომ მისი სახელი საერთაშორისო ასპარეზზე არაერთხელ გაიჟღერებს. რა თქმა უნდა, გვსურდა, რომ ჩვენი შეხვედრის ძირითადი მიზეზი მირიანი ყოფილიყო, თუმცა, გვერდი ვერც ბატონ ლადოს ავუარეთ. ვერც ავუვილიდით. ვლადიმერ ბარბაქაძე უდიდესი მეცნიერი, ტექნიკის მეცნიერებათა დოქტორი, პროფესორი, ნიუ-იორკის მეცნიერებათა აკადემიის აქტიური წევრია. 2003 წელს კი, ერთ-ერთ ვარსკვლავს, დათვის თანავარსკვლავედში, მიენიჭა ბატონი ვლადიმერ ბარბაქაძის სახელი. იმედია, ასეთივე აღიარებას, ამჯერად მუსიკალური კუთხით, მისი გენის გაგრძელება - მირიან ბარბაქაძეც მოიპოვებს. **თინა ახალკაცი**

## - სოფლის მეურნეობა - ბიოფერმერი, რომელიც უნიკალურ ქართულ ჯიშებს ამრავლებს

(დასასრული)  
ჩვენ ვცხოვრობთ იმ ეპოქაში, სადაც ნებისმიერი პროდუქტი მძიმე მეტალებით არის გაჯერებული და მაღალი ტოქსიკურობით ხასიათდება, მიუხედავად ბიოპროდუქტის მაღალი საბაზრო ფასისა, მოთხოვნა ყოველწელს მატულობს,



განსაკუთრებით, ეს შეიმჩნევა ბიოპურზე, რადგან პური ჩვენი კვების რაციონის 60 % მოიცავს. - საქართველოში წარმოებული ბიოხორბალი აკმაყოფილებს ბაზარზე არსებულ მოთხოვნილებას? - ჩემი წარმოების დინამიკას თუ გადავხედავ თ, 2006 წელში გავეყიდე 400 კგ დოლი და წელს გავეყიდი დაახლოებით 30 ტონას. ეს დეფიციტური პურია, ორი თვეა ბაზარს ვერ ვაწვდი ხორბალს, რაც ნიშნავს, რომ მოთხოვნა აჭარბებს მიწოდებას. მინდა ვთქვა და ბუნებრივიცაა, რომ მოთხოვნა ძირითადად თბილისიდან მოდის. ადგილობრივ ბაზარზე ჯერ დიდი მოთხოვნა არაა ფასიდან გამომდინარე, თუმცა, წინსვლა ამ მხრივაც შეინიშნება. ბიოპურის წარმოება საკმაოდ მარტივია და საოჯახო პირობებშიც ცხვება შეშის ღუმელებში. - რადგან ბაზარზე მოთხოვნა ვერ აკმაყოფილდება, გამოდის, რომ ბიო წარმოებით არც ისე ბევრი ადამიანი დაკავებული... - ჩვენ გვაქვს საქართველოს “მეხორბლეთა ასოციაცია”, რომლის ერთ-ერთი დამფუძნებელიც ვახლავართ, სულ მოვითვლით 15 ადამიანს, ვინც ბიოხორბალს აწარმოებს, რაც, დამეთანხმებით, ძალიან ცოტა არსებული ბაზრისთვის. წელიწადში, ბიოხორბლის რაოდენობა, დაახლოებით 200 ტონაა, რაც ინტენსიურად მიწოდების შემთხვევაში, მხოლოდ ერთი დღის ნორმაა. ვცდილობთ, დაეკავოთ ის ნიშა, რომ არსებობს ბიოპური და არის ქართული. - როგორც ვიცი, სულ რამდენიმე დღის წინ, თქვენს ბიოფერმერულ მეურნეობაში დიდი სტუმრიანობა იყო... - რამდენიმე დღის წინ მყავდა სტუმრები მეცნიერებათა აკადემიიდან და ჟურნალისტები საზოგადოებრივი მაუწყებლიდან, ასევე, მედიცინის მუშაკები, რომლებმაც შეისწავლეს და დაამუშავეს ინტენსიური ხორბალი. ჟურნალისტებმა გადაიღეს ყველა პროცესი, დაწვეული ხორბლის ადებით, გადაამუშავებით და ცხობით დამთავრებული. მანამდე მეავდნენ ამერიკელი და გერმანელი სპეციალისტები, რომლებმაც აღნიშნეს, რომ ასეთი კოლექცია ჯერ არსად გვინახავსო. განსაკუთრებით საზგასასმელია კოლექციაში “ზანდური”, “მასა” და შავი ქერი- ამ მხრივ, ჩემი კოლექცია ნამდვილად უნიკალურია. - მკითხველისთვის სამომავლო ამბებიც საინტერესო იქნება... - გარდა 25 ჰექტრისა, რომელიც საკუთრებაში მაქვს, ვიყიდე 7 ჰა, დასამუშავებელი მიწის ნაკვეთი. ნელ-ნელა ვფართოვდები. ვაძლევ მაგალითს სხვა ფერმერებს, რომ თუ უნდათ ქართული, ბიოხორბლის წარმოება, საქართველოში გვაქვს ამის შესაბამისი გამოცდილება და განათლება, შესაძლებლობა იმის, რომ სათესლე მასალაც მივაწოდოთ და სწავლების მეთოდებიც. დიდი სიამოვნებით დაგვხმარებით ყველა მსურველს. **თ. ჯავახიშვილი**



– ჩვენი მუნიციპალიტეტის ტურისტული ობიექტები –

### ულუმბოს მონასტერი

ულუმბოს მონასტერი დაარსებულია ცამეტი ასურელი მამათაგან ერთ-ერთის – მიქაელ ულუმბოელის მიერ. ვახუშტი ბაგრატიონის ცნობით: „ჭერათხევის სერის ზეით არის მონასტერი ულუმბას, უგუნბათო, დიდი, დიდშენი, მიქაელ იგ(13) მამათგანის ქმნილი და დაფლულ არს მიქაელ მუნვეზის წინამძღვარი.“

ულუმბო საფუძვლიანად დაურღვევია თემურლენგის ლაშქარს. ულუმბოს მონასტრის მეორედ აღშენების თარიღი 1400-1415 წლებით სახელდება.

ულუმბოს ამჟამინდელი ეკლესია 1871 წელს არის აღდგენილი. საბჭოთა პერიოდში აქ, ღვთისმსახურება შეწყვეტილი იყო. ბოლო პერიოდში, უძველესი ტაძრის გვერდით აშენდა წმინდა გიორგის სახელობის ტაძარი. დღეს, ამ კომპლექსში მამათა მონასტერია.

### მზია ხაბეიშვილი - დედა მასტრიდია

დედა მასტრიდია გარდაცვლილა - ალბათ, ერთ-ერთი ყველაზე ღირსეული დედაო დღევანდელ საქრისტიანო საქართველოში, მე კი მასზე - ქალბატონ მზია ხაბეიშვილზე უნდა ვისაუბრო, ხაშურის რკინიგზის 3 საშუალო სკოლის ფიზიკის მასწავლებელზე, უკეთილშობილესი სულისა და დიდი პროფესონალიზმის მქონე ადამიანზე, რომელსაც კოლეგებიც და ნამოწაფრებიც დღემდე განსაკუთრებული პატივისცემით იხსენებენ.



1985 წლის აპრილში, ჩემი მშობლიურ სკოლის კარი იმჯერად როგორც დირექტორმა შევადე და იქ ჩემს ყოფილ, უფროსი თაობის პედაგოგებთან ერთად, დამხვდნენ საშუალო თაობის მასწავლებლები, რომლებსაც უკვე მოეპოვებინათ საყოველთაო სიყვარული და აღიარება.

სწორედ ასეთი მზია ხაბეიშვილი გავიცანი მე და, იმ დღიდან მოყოლებული, მისგან ვსწავლობდი არა მხოლოდ საქმისადმი დიდ სიყვარულს, ამავე დროს, ის ძალიან ჩვეულებრივად და ძალიან ხშირად მეც და ჩემს ახალგაზრდა კოლეგებსაც გვიტარებდა ადამიანობის საოცარ გაკვეთილებს.

მშვიდი, მუდამ გაწონასწორებული, აკადემიური ქალბატონის ფიზიკის გაკვეთილები კი მართლაც იყო საჩვენებელი და განსაზოგადებელი და ასეც ხდებოდა, მისი გაკვეთილები ხშირად ზოგადდებოდა იმდროინდელი ამიერ

კავკასიის სასწავლო დაწესებულებებს შორის, მაგრამ რაც განსაკუთრებით მნიშვნავდა ამ ადამიანში, იყო ის, რომ ამით არასოდეს გაამაყებულა, ეს ყველაფერი ჩვეულებრივ ამბად მიაჩნდა, მისთვის მთავარი იყო ერთი პრინციპი: - ადამიანმა თავისი მოვალეობა ყოველგვარი ხმაურის გარეშე უნდა შეასრულოს.

რკინიგზის ხაშურის 13 საშუალო სკოლის ოქროს მედლით დამთავრების შემდეგ, მისი ყველა მასწავლებელი თვლიდა, რომ მზია მათ საგანს აირჩევდა მომავალ პროფესიად, რადგან ის ყველა საგნის ცოდნაში შეუდარებელი იყო, მან ფიზიკოსობა არჩია და თბილისის სახელმწიფო უნივერსიტეტის დამთავრების შემდეგ, თუმცა იქვე დატოვეს სამუშაოდ, ბუნებამ და უფრო საკუთარმა სურვილმა მშობლიურ ხაშურს დაუბრუნა და აქ გაშალა ფრთები, როგორც პედაგოგმა და მოქალაქემ, რომელიც ამ წარმატებულ მოღვაწეობას შესანიშნავად უთავსებდა, ყოფილიყო სანიმუშო ოჯახის დიასახლისი, მეუღლე და დედა. სამი კარგი შვილი გაზარდა, მაგრამ ცხოვრების ჩარხმა ჯერ მეუღლის, შემდეგ ვაჟიშვილის დაკარგვით გამოწვეული ტკივილი განაცდევინა, თუმცა ესეც ღირსეულად გადაიტანა და თავისი მომავალიც განსაზრგრა - სულიერებაში უნდა შესულიყო და მონასტრის კედლებში გადაეტანა თავისი დიდი სულიერი შესაძლებლობები.

მას შემდეგ დიდი დრო გავიდა. დღეს დედა მასტრიდია ტოვებს საწუთისო-ფლოს და მარადიულ სოფელში მიემგზავრება. გზა ხსნილი და ია-ვარდით მოფენილი ყოფილიყოს მისი საგალი...

შ. იტრიის დედათა მონასტერში ყოფნისას რამდენჯერმე მოვინახულე, მაშინ დედა მარიამნად მოიხსენიებდნენ. ვისხედით მონასტრის ეზოში და ვსაუბრობდით. ის არ ლაპარაკობდა წარსულზე, საუბრობდა მხოლოდ მომავალზე. ერთ-ერთი ასვლისას კი მითხრა: თქვენთვის ერთი პატარა ბარათი მაქვს გადმოსაცემი, ადრინდელია, სკოლის პერიოდისა, თქვენ გეკუთვნით და თქვენთან იყოსო.

სახლში მისვლამდე გავხსენი მისთვის ჩვეული სიფაქიხით შეკრული კონვერტი, რომელშიც ორი პატარა ფურცელი აღმოჩნდა; ერთი -ძველი, გაცრეცილი და ერთიც -ახალი. ამ უკანასკნელზე ეწერა: „ბ-ნო მურად! მაპატიეთ ფურცლის სიძველის გამო. ეს მაშინაა სუფრასთან დაწერილი. ვერ გავგებდე თქვენთვის მოძღვნა. ძალიან გთხოვთ, არავითარი რეაგირება არ მოახდინოთ ამ წერილზე. თუ რამედ გიღირდეთ, შეინახეთ. პატივისცემით

2 აგვისტო, 2005 წელი  
მეორე, გაყვითლებულ ფურცელზე კი პატარა ლექსი ეწერა, რომელიც მას ექსპრომტად უძღვნია 1986 წლის 5 თებერვალს, როცა საკანდიდატო დისერტაციის დაცვასთან დაკავშირებით, ჩემმა მასწავლებლებმა და კოლეგებმა გულთბილი სადამო გამართეს.

გარეთ თოვს, სულში საამო  
განწყობილება სუფევს,  
მეც მინდა რამე გითხრათ და  
ფიფქებში ვეძებ რითმებს.  
ბევრი ვისმინე დღეს თქვენზე  
საამოდ თქმული სიტყვა,  
ნეტავ ამ კერის აღზრდილზე  
მსგავსი მრავალზე ითქვას!

არ გამიტყვავს სიტყვა. ამდენი წლის მერე, მხოლოდ ახლა ჩავთვალე საჭიროდ მის დიდ ადამიანურ სიტბოს სწორედ ამ ბარათით მივახლებოდი და სწორედ ასეთი სიტბოთი და სიყვარულით დაემშვიებებოდი ჩემთვის პატივსაცემ და ძვირფას ადამიანს.

მურად მთვარელიძე

**D იყიდება!**  
სოფელ კოდისწყაროში, ტბის მიმდებარე ტერიტორიაზე, იყიდება სამოსახლკარო (სააგარაკე) მიწის ნაკვეთები, 500 კვადრატადან. ტელ: 551 503 135. სულიკო.

ა(ა)იპ ხაშურის მუნიციპალიტეტის გაზეთი „ხაშურის მოამბე“. დირექტორი გიორგი გოგალაძე, მისამართი: ხაშური, ტაბიძის ქუჩა №2. ტელეფონი: 24 30 27.  
E-mail Khashurismoambe2015@gmail.com მიმღების დასახელება: ხაზინის ერთიანი ანგარიში, საიდენტიფიკაციო კოდი 443860984, სახელმწიფო ხაზინა TRESGE22, სახაზინო კოდი: 749547499.  
D-ით მონიშნული სტატია იბეჭდება დაკვეთით გაზეთი იბეჭდება თბილისში. რედაქტორი რობერტ სუხიაშვილი.